

求闕齊弟子記

求闕齋弟子記卷七

東湖王定安撰

平寇四

咸豐十一年正月初六日賊酋劉官方由石埭分兩路趨祁門提督江長貴敗之於大洪嶺副將黃惠清迎擊於大赤嶺敗績初八日副將唐義訓敗賊於石門橋斬偽麟天豫古得金陣斃千人餘匪踰大赤嶺而逸初九日左宗棠鮑超擊賊於洋塘大破之初宗棠進扼梅源橋鮑超扼洋塘賊首黃文金踞洋塘對河之雞公坡由謝家灣泥灣一帶層層築壘聯絡二十餘里我軍因雨雪阻河未能出擊賊由謝家灘躡淺過河將潛撲

鮑超營後宗棠遣羅近秋護鮑超老營超率隊前擊賊潛於謝家灘搭浮橋三座分三路來撲另股犯超老營羅近秋等迎擊賊卽敗退超率衆乘之斬馘二千賊奪橋而走擁擠溺斃者數百人內有黃袍紅袍賊目十餘人駢死其中我軍乘勝將謝家灘賊壘盡毀平之僞定南主將黃文金身受重傷踉蹌宵遁遂分竄青陽彭澤等處 十一日陳海鵬破賊於香口時建德陸師失利夜四鼓忽有賊數千竄江邊欲襲安慶大營之後海鵬開礮轟擊賊黑夜不知官軍多少遂退救出難民數萬人 二十六日左宗棠鮑超克建德縣饒州九江兩屬肅清 李秀成圍建昌府 是月浙軍賁廷芳克富陽縣 二月左宗棠擊賊

於婺源之甲路連破之 初四日陳玉成糾捻匪犯羅田成大
吉敗之於松子岡斬捻酋龔瞎子 初八日陳玉成陷黃州府
武昌戒嚴時楚軍以全力圍皖公弟國荃統軍一萬餘人攻安
慶安徽巡撫李續宜駐青草壩福州副都統多隆阿駐桐城之
挂軍河湖北巡撫胡林翼駐太湖副將成大吉駐羅田之松子
岡余際昌駐霍山之樂兒嶺偽英王陳玉成圍援安慶偵知霍
山兵薄率悍賊十數萬從黑石渡直撲余際昌營際昌相持四
晝夜力竭而潰賊由英山入蘄水縣假官軍旗幟襲破黃州遂
分陷蘄州麻城黃安黃陂孝感雲夢等縣時省城僅存標兵五
千餘人官文飛咨李續宜自青草壩回援舒保率馬隊馳回彭

玉麟水師亦至城賴以全 初九日張運蘭破上溪口賊壘

十一日左宗棠敗賊於樂平之沿溝 張運蘭朱品隆克休甯

縣 陳玉成遣黨陷德安府遂陷隨州 二十二日劉官方遣

黨踰嶺趨祁門公遣軍擊卻之初公以西路歷口地當要隘令

沈寶成以三營守之僞右軍主將劉官方踞池州遣黨從樺

根嶺禾戍嶺分道破卞而入西路竄至箬坑圍撲歷口自卯至

午迭次狂撲我軍屹立不動公遣朱品隆由祁門赴援江長貴

出北路拒賊敗之於湘源楓樹嶺等處賊始退出嶺外 二十

九日左宗棠敗賊於范家村 二十日僞侍王李世賢陷景德

鎮總兵陳大富死之初公檄陳大富駐景德李世賢率賊眾數

萬潛匿於牛嶺柳家灣迴龍嶺三處距鎮三十里二十九日賊騎百餘由雙鳳橋竄至李村步隊繼之陳大富督軍迎擊賊衆不戰而退官軍追剿十餘里次日黎明大霧賊設伏於雙鳳橋等處大富中礮裹創血戰賊進營放火大富跳入李村河殉節景德鎮遂失守 公親赴休甯督攻徽州不克仍回祁門 三月左宗棠破賊於樂平宗棠以景德鎮復陷拔營赴樂平初五日遇賊於馬家橋敗之初八日敗賊於桃嶺初十日賊復由龍珠桃嶺擁至我軍屹立不動乘其懈而擊之賊奔潰十三日偽侍王李世賢逼城爲陣縱橫十餘里旗幟林立掩映山谷宗棠飭官軍俟其逼近排槍轟擊賊勢稍卻十四日賊撲西城宗棠率

諸軍開門出戰躍呼殺賊賊駭愕不知所爲追至高橋小溪賊自相踣籍李世賢改裝潛遁公疏稱左宗棠募勇五千餘人馳赴江皖之交方慮其新軍難收速效乃去秋堵勤黃文金大股今春擊退李世賢大股以數千新集之衆破十倍凶悍之賊因地利以審敵情善機勢以作士氣實屬深明將畧度越時賢伏乞

天恩將左宗棠改爲幫辦軍務俾事權漸屬儲爲大用

旨如議 賊酋陳玉成援安慶公弟國荃力戰卻之玉成旣踞隨州德安各留黨萬餘人守之牽制我軍自率精銳由蘄黃回竄宿松之桃花鋪多陸阿溫德勒克西率馬隊馳擊敗之十八

日陳玉成竄安慶至集賢關內焚燒房屋火光燭天玉成騎馬親至官軍後濠往來窺伺二十日黎明賊分三大股白毛嶺東至蕭家塢縱橫二十餘里旗幟林立玉成列隊菱湖北岸安慶守賊葉芸來亦率黨出城列隊菱湖南岸國荃飭軍士環濠屹立不動賊不敢逼玉成連夜於菱湖北岸築壘十三座葉芸來於南岸築壘五座城中出賊划置湖中以通往來二十二日國荃商請水師提督楊載福調蔡國祥礮船由東岸擡入菱湖派弟貞幹與蕭孚泗出濠護衛玉成遂分大隊捲旗疾趨由蕭家塢蜂擁而來蕭孚泗由中路堵禦多有斬獲忽賊馬數百騎由右路包抄圍蕭孚泗於核心趙其拔力戰死之貞幹急派張勝

祿出濠接應蕭孚泗衝突出圍仍大呼陷陣賊眾潰退是時蔡國祥礮船二十餘隻已入菱湖奪獲賊船二十三日楊載福又調唐學發舢板十餘隻入菱湖助戰轟斃甚夥玉成增修礮壘逼近我營國荃以我軍必據東路湖邊要地爲水師安泊之所乃可制壘賊之縱橫二十六日遣弟貞幹等出東路橫濠倚水畔扼要修壘玉成果以死力來爭我軍一半接戰一半修壘一晝夜而壘成自是水陸穩固無隙可乘矣 多隆阿擊援賊於桐城大破之當狗逆陳玉成之援安慶也僞璋王林紹璋僞玕王洪仁玕率黨二萬人自新安渡來援二十二日至練潭一帶連壘三十餘里將至馬踏石渡河竄往安慶與陳酋合股圍解

城圍多隆阿遣軍由橫山後抄至困賊核心橫尸遍野逼入菜
子湖淹死無數二十四日黃文金率糾捻匪二萬餘至天林莊
築壘二十餘座二十六日在挂車河出隊分布香鋪街等處二
十七日五鼓多隆阿進兵新安渡賊亦由新安渡迎頭蜂擁而
來多隆阿令游擊藍斯明參將朱希廣姜玉順梁宏勝趙克彰
分五營爲三隊布爲長蛇陣勢以遏賊衆賊搖旗猛撲二次各
營施放鎗礮不敢復近多隆阿登山矚望見賊勢趨重新安渡
其衆逾我數倍乃調副都統金順等率馬步隊自挂車河高河
鋪分道來助總兵雷正綰等由右路繞出參將穆正春等由左
路繞出金順率馬隊從香鋪街截襲賊後馬步併擊槍箭齊施

刀矛亂刺賊奪路而逃奔往天林莊負壘不出日暮大雨收隊斃賊二千餘名是日賊另股之撲挂車河者亦爲協領穆圖善所敗斃賊五六百名 是月李秀成攻建昌撫州未下乃陷吉安府官軍旋收復之秀成遂陷瑞州踞之 四月初一日公自祁門抵東流駐營自公駐祁門賊之環攻者不已迨景鎮被陷糧道斷絕誓以身殉國自書遺囑寄其家公平生艱苦之境以靖港鄱湖祁門三處爲最至是公弟國荃請公移駐東流乃令朱品隆守祁門張運蘭守休甯江長貴守柏溪唐義訓守漁亭沈寶成守厯口楊占魁守羊棧嶺公率五百人以行 初二日多隆阿攻天林莊賊壘盡破之 初七日公弟國荃敗賊於集

賢關陳玉成遁自多隆阿連破璋玕黃等股鮑超成大吉旦夕
將至玉成前阻圍師後迫援軍計窮思逃陸續進屯關外是日
國荃與彭毓橘率步隊八十餘人馬隊百人至關外審看地勢
陰與援軍約會夾擊甫近賊壘賊卽以大股分數路來撲國荃
令馬步據險列隊以待賊疑有伏遽止不前國荃遣隊迎擊殺
賊八十餘名初十日夜玉成由馬踏石鳧水遁去仍於集賢關
外赤岡嶺留賊壘四座與關內近壕之十三壘互相死守國荃
令軍士掘長壕將菱湖賊壘併包於長圍之內賊計始困 十
五日多隆阿擊賊於挂車河大破之嘗陳玉成之遁也多隆阿
已進偪磨山營派溫德勒克西等分途尾追曹克忠等先至遇

賊馬踏石河邊塵戰二時之久賊且戰且走紛紛斃水過河十
一日溫德勒克西金順遇賊包家大橋追殺至蔣家山十四日
陳玉成復剋偽璋王林紹璋偽玕王洪仁玕偽定南主將黃文
金偽格天義陳時永暨捻首孫葵心等髮捻共三萬眾馬賊四
五百名併力上犯由挂車河峒峽尖斜迤棋盤嶺列隊二十餘
里築壘八座陳玉成率悍黨數千由山內破焚黃家鋪團卡仍
出山外調黃文金四千餘人隱伏山內玉成自率悍黨分三路
圍撲我營次日黎明多隆阿派格通阿舒亮等設伏棋盤嶺溫
德勒克西常星阿設伏老梅樹街多隆阿親率馬步各營分五
隊而出初至河邊陳玉成林紹璋洪仁玕三路來迎正酣戰間

賊後軍忽亂溫德勒克西率伏騎衝入士氣百倍賊勢不支陳
玉成仍擱督敗匪并力死拒忽項家河賊營爲舒亮等伏兵所
焚煙焰突起賊遂慌亂傍山向桐城而逃多隆阿一面分兵進
剿黃家鋪一面督筋馬步跟踪追殺羣賊不敢戀戰奪路狂奔
所立八壘皆破斬殺無遺山內賊館數十處悉數焚燬濃煙布
滿山谷斃賊八千餘名生擒二百餘名奪獲軍械不計其數

左宗棠追擊賊於廣信府賊竄入浙江境 偽忠王李秀成由
瑞州分擾武甯義甯奉新等縣遂竄入湖北連犯興國大冶通
山崇陽等縣胡林翼遣軍堵擊之 是月都興阿敗賊於揚州
巴棟阿敗賊於鎮江 閩軍曾玉明克汀州府 五月賊由

羊棧嶺陷黟縣朱品隆江長貴張運蘭攻克之 鮑超成大吉
攻赤岡嶺賊壘四座自四月杪歷七晝夜始下之盡殲其眾公
與胡林翼會商令成大吉援鄂由武昌入興國大冶鮑超援江
西由九江入武甯瑞州鮑超行抵宿松紳民請留攻宿城不克
十四日張運蘭克徽州府 十六日彭玉麟蔣凝學克武昌
縣 二十二日左宗棠收復建德縣 二十六日左宗棠敗賊
於白沙關 是月李世賢竄浙江連陷松陽永康義烏等縣
六月初一日公弟國荃大捷於菱湖初安慶城賊於五月十五
以後陸續逃出乞降國荃分別斬釋三十日菱湖北岸賊壘僞
主將吳定才率悍黨撲營國荃力戰卻之遂會水師力攻北岸

十三壘盡克之南岸五壘同日攻克共平毀賊壘十八座斬級
八千 初三日胡林翼自太湖回駐武昌 李元度克通城縣
初六日李元度克崇陽縣 胡林翼遣成大吉何紹彩毛有
銘唐協和等由保安金牛連克興國大冶通山等州縣遂收復
咸甯蒲圻二縣 十四日李元度克義甯州 偽忠王李秀成
遣黨分擾德安建昌公檄鮑超赴江西援剿 七月初一日偽
英王陳玉成犯太湖胡林翼遣軍擊卻之玉成自安慶敗後糾
偽輔王楊輔清偽玕王洪仁玕由六安州竄英山繞宿松徑撲
太湖衆號十萬林翼誠諸軍慎密嚴守賊排隊山岡作長蛇勢
復有賊數萬自龍山宮對岸至塔下袤延二十餘里分途誘戰

我軍堅守不爲動賊不敢逼夜大雨賊衆洶湧潮進城中礮如雨落賊受創多斃太湖之圍始解 多隆阿大捷於桐城陳玉成自太湖敗後由小池驛竄至清河三橋頭高樓嶺欲結桐城之衆包裹官軍以解安慶之圍多隆阿遣隊從馬鞍山堵剿而僞章王林紹璋自桐城至挂車河蔣家山列陣以待參將譚仁芳副將石清吉分途迎敵賊衆披靡追至城根城賊出撲多隆阿親督兵勇堵截三門另軍急趨蔣家山拔木城二燬堅壘焚棚帳二百餘處賊向東路逃竄陳玉成楊輔清率大隊竄至高河鋪馬鞍山多隆阿添派馬隊分擊令雷正綰王可陞繞攻賊後桐城之圍復合 十一日金圍琛克德安府 十二日公弟

國荃攻安慶北門賊壘克之時城外各賊營剷平畧盡并燬其東門外月城惟北門外三石壘未克國荃遣程學啟從礮眼躍入擒壘中賊三百七十餘人於是三石壘皆下北門賊路已絕

十八日陳玉成犯安慶大營公弟國荃力戰卻之玉成率僞輔王章王干王眾十餘萬以少半駐桐城牽制多隆阿一軍以多半趨安慶拊官軍之背攻撲六晝夜國荃憑濠轟擊斃賊甚多賊不得逞 二十二日陳玉成復犯安慶營公弟國荃連擊破之 二十四日鮑超擊賊於樟樹鎮大破之初超自九江拔營前進僞忠王李秀成聞風遠遁率瑞州奉新清安安義之賊先分萬人擾撫州令僞豫王挑悍黨二萬攻豐城而自領大隊

由臨江過河盤踞樟樹沙湖豐城一帶綿亘百餘里二十三日
超至豐城對河偵賊在樟樹搭浮橋次日賊大股排列山岡超
飭陳由立等由中路進黃慶率等由左路進易昌煥等由右路
進宋國永婁雲慶唐仁廉等由山後進賊搖旗迎戰超揮軍分
撲鏖戰一時之久賊大敗追殺五十餘里斬級八千公疏稱李
秀成擁眾十萬竄擾江西湖北連陷二十餘城盤踞瑞州附近
各州縣數月於茲意在斷我餉源以急解安慶之圍鮑超督師
進援該逆聞聲先遁至豐城西北岸復被鮑超追及經此番痛
勦洵足快人心而寒賊膽記名提督殺靖鎮總兵鮑超盛暑鏖
兵所向克捷請 賞賚荷包搬指等物以示優異

旨報可 八月初一日公弟國荃攻克安慶省國荃自七月二十
十二日獲勝後守賊葉芸來復於濠外修月牆以避礮子國荃
縱壯士數十人出濠外踏毀之親率各勇增修新壘伏精兵於
濠之左右以防衝突賊傾巢出由鹽河至十里鋪以東直撲新
壘我軍奮力夾擊僵尸滿田壠陳玉成楊輔清親援桴鼓舞陣
歿不前者賊猛撲十餘次而新壘已成自夜達旦殲銳賊三千
餘始收隊自二十三日至二十八日賊輪班遞攻國荃督各營
官輪營應之羣賊旣屢戰皆挫又於菱湖北岸築壘十餘座昇
小艇泛湖汊齎糧入城水師蔡國祥駛礮船截奪之是夜賊酋
葉芸來自城內運礮赴賊壘亦爲我軍所奪賊計窮無所施三

十日我軍地雷成至初一日卯刻發火轟坍西北門城垣國荃整隊而進分班勦殺臨水一面之賊多出南門投江死其西東北三門之賊皆爲我軍截殺從百花亭跳城逸出者水師盡殲之城悍賊無一漏網者陳玉成楊輔清洪仁玕各股援賊屯紮我軍後濠之外列隊遠望膽落遁去於是安慶陷賊九年矣公弟國荃晝夜圍攻克此雄都是爲肅清東南之始 初七日公至安慶受俘疏言查安慶省城咸豐三年被賊陷踞九載以來根深蒂固自去冬合圍至今逆酋四眼狗迭次拚死援救我軍苦守猛戰卒得克此堅城圍殺淨盡軍輿十載惟五年之馮官屯八年之九江此次安慶之賊實無一名漏網楚師圍攻安

慶已逾兩年其謀始於胡林翼一人畫圖決策商之官文與臣並徧告各統領前後布置規模謀勦援賊皆胡林翼所定詳細情形另由官文胡林翼具奏

上諭會國藩馳奏克復安慶省城等語據稱卽用道會國荃稟稱官軍用地雷轟倒安慶北門城垣踰壕登城殺斃長髮老賊二萬餘人該逆赴江內湖內梟水遁竄又經水師截殺城內悍賊無一得脫逆首陳玉成膽落退去等情洵足以伸天討而快人心會國藩調度有方著賞加太子少保銜會國荃於圍攻安慶時智勇兼施著賞加布政使銜以按察使記名遇缺題奏并賞穿黃馬褂候選訓導曾貞幹著免選本班以同知直隸州知

州選用并賞戴花翎候選同知會國華前在三河殉難今其兄
會國藩其弟會國荃會貞幹率師勦賊克復安慶一門忠義深
堪嘉尚會國華著加恩予諡以彰忠烈予諡愍烈於是楊載福遣黃
翼升等克池州府銅陵縣多隆阿克桐城舒城宿松黃梅四縣
鮑超追賊於撫州等處大破之遂克鉛山縣江西肅清凡公都
諸軍所向皆捷 二十四日胡林翼遣軍克黃州府林翼檄彭
玉麟水師蔣凝學陸師會攻黃州城堅猝難下蔣凝學以計誘
賊出城我軍乘之賊棄城遁 二十六日太子少保湖北巡撫
胡林翼卒於軍

詔贈總督

賜祭葬于諡文忠入祀賢良祠湖北湖南皆建祠公以林翼忠勤盡瘁疏列戰功政績請

宣付史館云胡林翼由翰林起身洊歷外任咸豐五年三月蒙先皇帝特達之知由貴州道員不及半載擢署湖北巡撫當是時武漢三次失陷湖北州縣大半淪沒各路兵勇潰散殆盡胡林翼坐困於金口洪山一帶勞身焦思不特無兵無餉亦且無官無幕自兩司以至州縣佐雜皆遠隔北岸數百里外一錢一粟皆親作書函向人求貸情詞深痛殘破之餘百不一應至發其益陽私家之穀以濟軍食士卒爲之感動會湘勇自江西援鄂軍勢日振六年十一月攻克武漢以次恢復黃州等郡縣論

者以爲鄂省巡撫可稍息肩矣胡林翼不稍爲自固之計悉師越境圍攻九江又分兵先救瑞州督撫之以全力援剿鄰省自湖北始也九江圍剿年餘相持不下中間石達開自江西窺鄂陳玉成自皖北犯鄂者三次胡林翼終不肯撤九江之圍回救本省之急或親統一軍肅清蘄黃或分遣諸將驅歸皖豫卒能克復九江殺賊淨盡爲東南一大轉機尋功甫歲復奏明以全鄂之力辦皖北之賊迨李續賓覆軍於三河胡林翼先以母喪歸籍未滿百日間信急起痛哭視師不入衙署進駐黃州論者又以李續賓良將新逝元氣未復但可姑保吾圍不宜兼顧鄰封胡林翼不以爲然驚魂甫定卽派重兵越二千里援解湖南

寶慶之圍援湘之師未返又議大舉圍院是時臣國藩方奉入蜀之

命胡林翼留臣共圖院疆先滅髮匪保三吳之財賦雪敷天之公憤繪圖數十紙先致臣與官文暨諸路將領晝夜諮謀十年春間大戰於潛山太湖相繼克之遂定圍攻安慶之策親駐太湖督勦本年五月回援鄂省病中猶屢寄臣書縷陳勿撤院圖力勦援賊之策故安慶之克臣前奏推胡林翼爲首功非蔽臣私議蓋在事文武所共知亦

大行皇帝所洞鑒也大凡良將相聚則意見紛歧或道義自高而不免氣矜之過或功能自負而不免氣識之偏一言不合動

成水火近世將材推湖北爲最多如塔齊布羅澤南李續賓都
與阿多隆阿李續宜楊載福彭玉麟鮑超等胡林翼均以國士
相待傾身結納人人有布衣昆弟之歡或分私財以惠其室家
寄珍藥以慰其父母前敵諸軍求餉求援竭厥經營夜以繼日
書問餽遺不絕於道自七年以來每遇捷報之摺胡林翼皆不
具奏恆推官文與臣處主稿偶一出奏則盛稱諸將之功而已
不與焉其心兢兢以推讓僚友扶植忠良爲務外省盛傳楚師
協和親如骨肉而於胡林翼之苦心調護或不盡知此臣所自
媿昔時之不逮而又憂後此之難繼也軍興以來各省皆以餉
絀爲慮湖北三次失守百物蕩盡乙卯丙辰之際窮窘極矣自

荊州權鹽各府抽釐鄂中稍足自存胡林翼綜覈之材冠絕一時每於理財之中暗寓察吏之法咸豐三年部定漕米變價每石折銀一兩三錢而各省州縣照舊浮收加至數倍鄂省竟有每石十數千者上下因之交困胡林翼於七年春間創議減漕嚴裁冗費

先皇帝硃批獎勵謂其不顧情面祛百年之積弊甚屬可嘉統計湖北減漕一項每年爲民間省錢一百四十餘萬串爲帑項增銀四十二萬兩又節省提成銀三十一萬兩利

國利民但不利於中飽之蠹向來各衙門陋規台局浮費革除殆盡州縣征收正課不能浮取毫釐亦不準借催科政拙之名

爲滑吏肥私之地各卡委員日有訓月有課批答書函娓娓千
言以爲取民贍軍使商買皆知同仇而敵愾是卽所以激忠使
局員皆知潔己而奉公是卽所以興廉貞白之士樂爲之用欺
飾之徒譴責亦重故湖北瘠區養兵六萬月費至四十餘萬之
多而商民不疲吏治日臻斯又精心默運非操切之術所得與
也自頃八月以來安慶克復江鄂肅清方幸全局振興便可長
驅東下不圖大功未竟長城遽頽湖廣督臣官文奏請將胡林
翼

敕部優卹諒蒙

聖慈矜鑒臣與該故撫共事日久相知頗深咸豐四年曾奏稱

胡林翼之才勝臣十倍近年遇事諮詢尤服其進德之猛不敢
阿好溢美亦不敢沒其忠勳謹將該故撫以死勤事大畧情形
據實瀆陳疏入奉

旨宣付史館

詔以李續宜爲湖北巡撫彭玉麟爲安徽巡撫 是月僞侍王
李世賢陷嚴州府餘杭縣 九月初二日公弟國荃率師東下
遣陳湜李寶賢率陸師由廬江進無爲而以劉連捷代守廬江
國荃帶親兵及蕭孚泗彭萬全等軍乘礮船順流而東十五日
次泥汊口乃登岸十六日克泥汊口十九日克神塘河二十日
克無爲州初國荃以無爲州濱江爲蕪湖金陵援賊必經之路

利在速攻使南北之氣中斷我軍既克神塘河水師王明山乘勝進抵州城陸軍亦坐船同進賊首馬玉堂之妻子先在安慶城國荃執而不殺以密諭招降之馬玉堂感激投誠僞頂王朱王陰覺之械繫馬玉堂玉堂黨大閘城中人聲鼎沸我軍乘其亂而擊之賊大驚國荃令諸軍分路攻城賊自北門竄出陳湜劉連捷率馬步大隊從盛家橋而來截剿竄賊各軍整隊入城前後斬斃二千餘人 二十三日公弟國荃克運漕鎮二十九日克東關公疏稱江北之無爲州與南岸之蕪湖相對賊南踞金陵則蕪湖在所必爭北踞廬州則無爲在所必爭東關之險運漕之富尤該逆所持爲奧區三國用兵時於東關濡須口苦

爭不休卽此地也茲幸仰仗

天威旬日之間連攻兩城一鎮要害三處殺賊甚多從此廬州
巢縣三河踞賊糧援路梗勢必漸漸搖動擬留陸軍九千分守
無爲運漕及蒼頭東關等處添調淮揚水師數營分布協守可
期穩固 時公弟國荃軍威所至勢如破竹駸駸有直搗金陵
之勢而所部兵勇分守安慶樅陽廬江無爲運漕東關六處別
無游擊之兵公令國荃回湘添募六千人在皖替守各城抽出
守兵分勦巢縣和州於是進取之謀稍緩 是月李世賢陷蕭
山諸暨縣遂陷紹興處州兩府 十月初一日公弟國荃還至
安慶商定增募湘勇直搗金陵之計旋奉

旨賞給頭品頂戴 劉嶽昭舒保克隨州 初六日公弟國荃
啟行回湘 時李秀成李世賢麇集浙江分陷郡縣幾無完土
而餘杭新城皆爲賊巢逼近杭州京朝士大夫密疏請

飭浙江軍務兼歸會國藩督辦

上諭會國藩著統轄江蘇安徽江西浙江軍務所有四省巡撫
提鎮以下悉歸節制浙江軍務著杭州將軍瑞昌幫辦浙江提
鎮以下均歸太常寺卿左宗棠調遣至都興阿在江北袁甲三
在皖北遇有緊要軍務並令該將軍等會商會國藩辦理公上
疏力辭且薦左宗棠前在湖南贊助軍謀兼顧數省其才實可
獨當一面請明降

論旨令其督辦浙江全省軍務奉

旨左宗棠速赴浙江督辦軍務毋稍遲緩

十一月公疏上

援浙方畧謂近年以來江西屢被賊擾閩粵之賊由撫建北出而入浙皖浙皖之賊由信饒南竄而擾腹地皆以廣信爲必經之路本年三月七月僞侍王李世賢僞忠王李秀成先後由江入浙皆以廣信爲出奔之途是欲保江西宜於廣信設防欲援浙江宜從廣信進兵必然之勢也自紹興失守杭州危急臣等日夜憂皇以浙境一日不清則江西一日不安而大局亦終不能轉屢次函商謀所以救浙之策無如地廣兵單不敷分布而浙中賊勢浩大亦非數千人所能救解臣國藩現令鮑超一軍

由青陽前進朱品隆一軍由石埭前進會期甯國欲以分級浙中賊勢第恐僞輔王悉眾堅守勢不能遽拔甯郡之城卽不能少解浙江之阨惟幫辦軍務太常寺卿左宗棠久駐廣信距賊較近其平日用兵取勢甚遠審機甚微近日屢與臣等書函毅然以援浙爲己任督臣慶端撫臣王有齡亦奏請左宗棠統軍入浙臣等往返熟商卽請左宗棠督率所部進援浙江并將駐防徽州之臬司張運蘭駐防廣信之道員屈蟠駐防玉山之道員王德榜參將顧雲彩駐防廣豐之道員段起各軍及副將孫昌國內河水師均歸左宗棠就近節制調度兵力稍厚運掉較盛於援勘浙皖之時仍步步顧定江西門戶庶於三省全局有

裨左宗棠距臣行營相去千里一入浙境聲息難通一切軍情應由左宗棠自行奏報以昭迅速

上諭左宗棠業已降旨令其督辦江浙軍務并準其自行奏事江浙軍情本屬一氣相關該大臣思慮所至諒無不協力同心相資辦理 多隆阿收復三河鎮 二十二日僞輔王楊輔清犯徽州府張運桂敗之於深渡二十六日楊輔清大舉分犯徽州休甯二十七日僞成天安桂首犯休甯之屯溪唐義訓擊卻之 二十八日賊陷杭州省張玉良戰歿將軍瑞昌浙江巡撫王有齡等死之初李秀成李世賢合竄浙江九月二十五日從塘路直抵省城撲武林門外賈魚橋踞我營卡布政使林福祥

提督饒廷選先後引兵還省城賊隊大至糧道阻絕十月初五日張玉良由上游來援列營城外王有齡登陣固守賊不得逞乃自海潮寺至鳳凰山環以木柵實土其中使城外官兵隔絕十九日張玉良攻木柵中礮陣亡我軍愈怯城內闕糧人多餓死二十八日賊由鳳凰山望江兩門攀堞而入城遂陷有齡自經於署越四日滿城亦陷瑞昌殉難先後死節者學政張錫庚浙江提督饒廷選處州鎮總兵文瑞鹽運使莊煥文副將繼興十二月公因浙江失守自請嚴議并疏稱蘇浙兩省膏腴之區盡爲賊有賊數號稱五十萬旣得逞志於浙勢必上竄皖南內犯江西以攝我後路而分我兵力東南大局收拾愈難謹就

愚慮所及條列於後一浙江所存惟湖郡與海州二城皆孤懸賊中皆無倖全之理惟衢州一府可以堅守左宗棠應暫於徽衢信三府間擇要駐紮先固江西皖南邊防保全完善之地一浙省之賊由分水滄遂內竄則徽州婺源當其衝由開化江常內竄則廣信玉山當其衝若由遂昌龍泉至浦城而竄江西之鉛山福建之光澤則浦城當其衝左宗棠以數千人分防徽信兩路斷難兼顧閩防應請

敕慶端速派勁旅嚴守浦城俾賊不得由閩境而竄江西一蘇浙糜爛人皆視爲畏途惟有選擇能戰之文員補授兩省之實缺庶可漸漸集事一請

飭廣東督撫於粵海關按月協撥銀十萬兩交左宗棠軍營以資飽騰時左宗棠疏陳援浙情形與公論畧同

詔皆允之 鮑超破賊於青陽 二十六日朱品隆破賊於徽州左宗棠分兵破賊於大鱗嶺徽州解圍

詔授左宗棠爲浙江巡撫 時彭玉麟兩疏力辭安徽巡撫之命公疏稱彭玉麟素統水師舍舟登陸用違其長且江面太長照料匪易請另

簡皖撫俾得仍領水師於南北大局兩有裨益

詔授彭玉麟兵部右侍郎以李續宜調安徽巡撫嚴樹森調湖北巡撫

同治元年正月初一日

詔授公協辦大學士初四日

詔授曾國荃浙江按察使 大學士翁心存奏稱蘇常紳民結團自保盼曾國藩如慈父母請飭該大臣派一素能辦賊之員馳赴通泰由江陰常熟進搆奉

旨曾國藩能否派員前往著迅速籌辦以慰民望以紓朕南顧之憂又

諭賊匪陷杭城後勢將窺伺松滬曾國荃募勇是否回營著曾國藩催令統帶老勇八千人赴滬助剿既可防守上海兼可乘虛襲攻青浦等處爲規復蘇常之計毋失事機 公薦福建延

建邵遺缺道李鴻章率兵援江蘇先是鴻章贊公幕府公疏請
簡放江北地方實缺與辦淮揚水師事未果行咸豐十一年十
月候補主事錢鼎銘賁吳中官紳書函御輪船來皖乞師公以
淮南風氣剛勁欲另立一軍以爲中原平寇之用因疏稱李鴻
章堪膺封疆重任現在臣處統帶水師擬酌派數千人駛赴下
游以資援助奉

旨報可總兵富陞戰歿於鎮江初提督馮子材守鎮江賊久圍
不下僞勇王洪仁發率賊萬餘至東陽打館僞守王方海宗偕
龍潭石埠橋諸賊水陸分途齊攻鎮城將軍都興阿駐軍揚州
遣海全帶二千人赴援會同子材出城勦賊富陞中礮以殞子

材飛疏入告

上以鎮江爲江南北樞紐馮子材等堵剿未能得手都興阿續派詹啟綸前往救援賊勢仍未衰滅而金陵蘇常各匪圍擾江北飭公催李鴻章統水陸各軍迅速起程 江蘇巡撫薛煥奏江浙兩省逆匪糾衆數十萬併力東趨竄陷奉賢南匯川沙三廳縣寶山吳淞口情形喫重松江上海危急萬分請催曾國藩派兵赴援

上諭李秀成悉衆東趨垂涎松滬上海兵力不厚豈能當此大敵著曾國藩飛催曾國荃將所募湘勇留防安慶剋日督帶老營八千救援上海倘曾國荃尙無實在消息卽著該大臣月派

勁兵前往援應 金陵援賊渡江都興阿迎擊於天長敗之
上諭都興阿奏進攻天長獲勝一摺楚師進規金陵必由天六
爲進兵之地該逆踞守天長金陵援賊渡江已抵儀六聲稱攻
撲揚州都興阿兵力不厚曾國藩節制兩江自當通籌兼顧惟
該大臣分兵援浙防勦徽甯又籌進勦苗練及沿江列戍之兵
爲數已屬不少恐致兵分力薄前因諭令將江南北等處餉需
通籌協濟并諭派員整頓兩淮鹽務若得此巨款不必專仰給
湖北江西餉項自可裁汰疲弱添募新勇撥給都興阿統帶至
上海關稅每歲可得數百萬昨諭曾國荃帶勇八千赴滬力保
該大臣餉源且可進攻蘇常牽制賊勢現在江浙徧地賊氛祇

有鎮江一隅爲進兵適中之地著催李鴻章迅速赴鎮遲則此著又恐落後該大臣身任統帥事非越俎不必稍避嫌怨總期於事有濟江浙軍務朕惟該大臣是賴 是時公弟國荃回湘募勇尙未到皖

朝廷屢諭由滬圖蘇公郵書商之國荃國荃謂金陵爲賊根本急攻金陵賊必以全力援護而後蘇杭可圖公壯其謀因以圍攻金陵屬之國荃於是東南肅清之局定矣 二十四日公上規取蘇浙方畧云杭州旣失以後左宗棠擬由徽郡進攻嚴州下以扼杭城之吭上以作衢州之蔽然必攻克開化遂安等城乃有赴嚴之路必須留守婺源華埠等處乃無抄後之虞臣前

奏須俟蔣益澧一軍到衛分途進攻非過於持重故事遷延也
實因賊數太多佔地太廣動輒以長圍困我若非左宗棠直搗
嚴州恐衢州終困於長圍之中臣之愚見必俟左宗棠圍攻嚴
州鮑超進抵甯國浙事乃有下手之處翁心存奏請臣馳赴通
泰乘虛由江陰常熟進搗蘇常如或不能則力保裏下河數百
里沃壤又宋晉奏請都興阿派兵由靖江泰興分進江陰常州
各條均極詳慎周妥惟都興阿一軍須先肅清江北俾後路無
牽制之虞現聞天長六合均經克復江北僅浦口江浦兩城如
卽乘虛克復上可通會國荃無爲運漕各軍之氣下可聯袁甲
三臨淮滁州各軍之援則江北片段旣成根基旣固然後會合

上下游分路規取南岸方不致凌躐無序曾國荃新募到擬進攻巢縣和州一路通下游鎮陽各軍之氣仍固上游無巢一面之防未便遠赴上海顧此失彼至上海餉源所出關係亦重臣已片陳明聯絡洋人協力守禦江浙賊勢浩大盡占富庶之區廣收官軍之降卒財力五倍人數十倍若非慎以圖之不特蘇浙難克卽皖南江西且有疆土日蹙之虞過求速效以至債事轉非所以仰慰

慈廑

上嘉納之二十九日左宗棠敗賊於開化是時眾論紛歧圖浙圖蘇期效旦夕公力主持重扼上游以固根本不敢爲輕

率進兵之謀亦不敢以未來之事率爾入奏

上因章奏稀少

諭曰曾國藩左宗棠李續宜均負時望卓著戰功疊經先後簡任督撫畀以重任原冀合力通籌挽回東南大局前經曾國藩等奏稱克復漕鎮無爲方冀東征之師可以直下江南乃自去冬以來該督撫等奏報甚稀幾於月僅一至而浙省府縣疊次報陷蘇省松滬警報頻來皖北則苗練與髮逆交乘圍穎甚急朕以冲齡踐祚荷蒙

兩宮

皇太后孜孜求治舉賢任能每於該大臣等所陳規畫言聽計

從而該大臣等章奏寥寥而服愧懷殊深厯念現在會國荃是否到營李鴻章是否到鎮鮑超進規甯國是否得手多隆阿等會否分攻廬壽楊載福何時銷假與彭玉麟并圖東下著分別速奏公分條復奏一會國荃新募湘勇二月底可抵安慶擬令其進攻巢縣和州含山等處以達金陵楊載福回湘後因辰沅有賊留湘防守已催令二月回營一李鴻章新募淮勇五營另撥湘勇數營二月可以成軍擬由陸路赴鎮江一進攻金陵必俟腳跟已穩而後可圖進取一潁州被圍李續宜已派兵赴援一謀浙宜從衢嚴之間下手現在左宗棠屢獲大勝一松滬告急擬借洋兵防守并陳奏報甚少蓋亦有故一則不輕奏謠傳

之言一則不輕奏未定之事一則不輕奏預計之說嗣後擬十日奏事一次有急則加班具奏奉

上諭前因該大臣奏報稀至寄諭垂詢茲據歷陳所以奏報較稀之故不欲以未定之事預計之說及謠傳等詞遽行入告係屬敬慎將事各路軍營往往以游移無據等詞輕率馳奏本屬近來軍營陋習會國藩自前次寄詢之後業已兩次奏到軍情已屬不少此次奏稱擬定十日奏事一次有警則再加班轉覺近於拘滯况軍營奏報原無定期其疏數視乎軍情之緩急該大臣仍當毋失常度力求實濟正不必變更前轍也 二月多隆阿擊廬州賊連破之 初九日左宗棠克遂安縣初宗棠由

葵入浙三戰皆捷遂進軍遂安之橫沼百畝畝墩南等處偵知楊村紮賊館遣王開來劉典等分路攻楊村破之斬賊目完天安盧有成生擒偽符天侯羅音等夜四鼓攻城賊突圍逃去追殺二十里十二日宗棠入城安撫居民留老湘營二千五百人守之卽拔營馳援衢州 十五日公弟國荃率新募湘勇六千人抵安慶

詔授國荃爲江蘇布政使公疏稱臣弟國荃暫不接印視事飭令攻取巢縣含山和州西梁山等處冀與袁甲三都興阿各軍黏連一片庶金陵有規復之期大局有轉旋之勢 二十四日公弟國荃率師東下前鋒陳湜蕭孚泗等破賊於銅城關 李

世賢犯遂安左宗棠遣軍擊走之。三月初一日公檄張運蘭扼婺源白沙關屏蔽江西。初七日鮑超擊援賊於壽陽城外大破之。初十日李鴻章師次上海初公議定鴻章一軍取道巢舍前赴鎮江。

朝旨敦促者屢矣適江蘇紳士錢鼎銘潘馥等備銀十八萬兩僱輪船來皖迎師公遂檄鴻章初八日開行湘淮各軍分起下駛徑抵上海鴻章部將程學啟者桐城人自賊中自拔來歸初隸公弟國荃部下曉果善戰國荃之克安慶也學啟功尤多郭松林者湘潭人始以親兵隨公弟國荃其後鴻章弟鶴章挈之以東二人者皆楚軍之良也淮南被賊蹂躪久一時豪傑皆結

鄉堡以自衛而六安李元華始爲淮軍之倡劉銘傳潘鼎新張樹聲吳長慶等響應而起鴻章招令各募一營淮軍之興自此始矣旋奉

旨以李鴻章署江蘇巡撫 十三日公弟貞幹破賊於荻港舊縣三山夾等處計五日公弟國荃破賊於望城崗十五日鮑超克青陽縣十八日國荃破賊於銅城關遂克雍家鎮巢縣含山縣二十一日貞幹克繁昌縣二十二日國荃克和州鮑超連克石埭太平二縣二十三日國荃克裕溪口次日遂克西梁山沿江北岸賊壘悉破平之二十七貞幹破賊於魯港二十八日鮑超克涇縣三十日貞幹克南陵縣此次國荃貞幹分南北岸

東下泱旬之內連克名城要隘西梁山古稱天險賊恃爲金陵門戶竟以輕兵襲奪之而左宗棠之軍連獲勝於江山常山之境聲威大振捷聞

詔曾國荃交部優敘曾貞幹賞迅勇巴圖魯名號 是時公統制各軍弟國荃循江北岸至於和州弟貞幹循江南岸至於南陵彭玉麟水師中江而下助勦兩岸是爲直搗金陵之師李鴻章率湘淮陸勇佐以黃翼升水師是爲援勦蘇滬之師大江以北多隆阿爲圍攻廬州之師李續宜爲赴援潁州之師大江以南鮑超爲進攻甯國之師張運蘭爲防勦徽州之師左宗棠爲規復全浙之師十道并出皆受成於公公建節安慶居中控馭

廣輪數千里此外如袁甲三及李世忠淮上之師都興阿揚州之師馮子材魁玉鎮江之師均奉

旨統籌兼顧羽書旁午英俊風驅上而

朝端倚畀之隆下而薄海仰望之切洵千載一時矣 是月僞

英王陳玉成遣僞扶王陳德才等竄河南擒首孫光危陳大溘助之南陽戒嚴 四月初二日張運蘭克旌德縣 初五日彭

玉麟水師進攻金柱關 十四日常勝軍克青浦縣 十五日

多隆阿克廬州府僞英王陳玉成伏誅自我軍攻克安慶陳玉成率黨由石牌西上調宿松黃梅之賊同至野雞河欲赴湖北德安襄陽一帶招集醜類賊首不從乘夜至六安竄廬州泉志

漸攜貳僞天王洪秀全督責復切遂欲效死於廬久踞不退楚軍多隆阿節節進剿四面合圍初十日密約皖軍總兵張得勝至北門設伏誘賊果出城迎敵鏖戰逾時我軍佯退引賊追過小岡見我軍旌旗密布驚潰回奔多隆阿揮兵掩殺賊不敢復出張得勝等紮營緊逼城垣賊率悍黨出東北兩門攻撲皖軍挑選精銳出營力戰楚軍已於東門獲勝馳至北門從賊後包抄斷其歸路賊遂大潰兩軍乘勢搶越城壕賊回城無路遂向西北奔竄轟斃殺斃落水死者不計其數克蒙額等會合夾擊多隆阿分隊進城搜殺餘匪陳玉成率餘黨西竄十七日至壽州城外中津渡先是練酋苗沛霖陰受玉成僞封旣怙於楚

軍威聲欲誘執玉成以自効使苗景開往迎之玉成餘黨二千
人皆置城外俾率親兵數十入城苗景開撤去吊橋遂縛玉成
并擒偽導王陳仕榮偽從王陳德隆偽統天義陳聚成偽天軍
主將向士才偽虔天義陳安成偽禱天義梁顯新及親隨偽官
二十餘人擒首張落刑訶知之糾捻黨於二十六日突至江口
集北岸將何際刦奪苗練擊走之遂械送勝保大營檻送京師
至延津縣奉

青凌遲處死傳首皖豫陳玉成凶狠善戰軍中呼爲四眼狗自
韋楊相殺石首遠竄偽天王洪秀全倚玉成及李秀成爲左右
手秀成權詐有餘而慄悍不及玉成自玉成授首楚皖之間稍

得息肩矣。公弟國荃會彭玉麟克太平府遂克金柱關東梁山蕪湖縣賊自踞金陵分黨據險以蕪湖爲屏障以東西梁山金柱關爲關鍵二十日國荃引軍南渡會玉麟定計水陸會攻圍荃率馬步十五營近逼金柱關下玉麟派水師從上游環擊賊被我軍牽制國荃乘間疾抵太平府北門賊駭走閉關不及我軍擁進斬馘三百餘級遂復其城二十一日玉麟瞭見國荃繞出三汊河遂分水師爲三隊以二隊守險以一隊攻金柱關賊於烈焰中衝突而出積骸滿梁卽時攻克金柱關并將三汊河上駟渡數十壘一律燬平玉麟另派黃翼升襲破東梁山十二日進次蕪湖公弟貞幹率所部循江而進與黃翼升會攻

羣賊潰奔立將蕪湖克復並攻克烈山石壘二座 偽輔王楊
輔清犯遂安左宗棠遣劉典迎擊之賊宵遁 是月偽扶王陳
德才偽端王藍成春偽增王賴文光偽啟王梁成富偽主將馬
融和等由河南竄陝西入武關至尹家衛西安戒嚴巡撫瑛棨
遣軍擊敗之賊竄陷渭南縣與川匪藍大順等合遂由潼關竄
河南閿鄉縣 五月公弟國荃進軍金陵營於雨花臺國荃自
克太平府進攻秣陵關秣陵關者金陵之雄鎮亦大勝關之右
輔也維時賊備未嚴官軍掩至守關賊首舉關降官軍繞出三
汊河後進逼大勝關編木作橋初二日國荃派軍先伏橋邊而
以後隊六營捲旗疾進賊見我軍鈔後懼爲長圍所困乘夜縱

火乘巢而走官軍追擊敗之遂奪大勝關三汊河兩壘平之時
彭玉麟駐金柱關聞國荃懸軍深入恐爲賊乘急調水師策應
由烈山駛近頭關適國荃亦於初三日昧爽整旅而來水師於
狂風巨浪中排礮仰擊無少休陸軍乘之立拔頭關彭玉麟進
攻江心洲洲有石壘雙峙屹若堅城水師飛砲入壘賊亦穴牆
還擊戰至日晡水師挾火具登岸蛇行蘆葦中逼壘縱焚火光
燭天我軍躍入賊牆燒薙羣醜撲火溺水橫塞江流水師乘勝
鼓柁飛行立奪蒲包洲遂泊金陵之護城河口國荃由陸路倚
護水師驅軍直入偪紫雨花臺距城僅四里耳公弟貞幹駐三
汊河江東橋一帶傍水築壘以保西路糧道是爲規取金陵之

始 初四日鮑超擊賊於寒亭管家橋等處逆壘悉破平之
十二日偽天王洪秀全遣黨糾眾二萬犯雨花臺營公弟國荃
設伏擊卻之 十五日鮑超擊賊於抱龍關進攻甯國府

上諭都興阿奏上游水陸各軍乘勝東下將沿江各縣及各
要害次第攻克現已進攻雨花臺都興阿派兵由瓜洲起旋進
攻觀音門踰平賊卡并將燕子磯賊壘踏毀期與楚軍聲勢聯
絡辦理甚屬認真所稱金陵逆首現在飛調偽忠由蘇常統
帶大隊援救金陵一經官軍勦敗勢必鋌走下游所慮不爲無
見李鴻章駐軍上海近因嘉定復被賊踞滬城軍情又緊該署
撫能否抽身赴鎮著會國藩兼權緩急酌量辦理 李鴻章會

洋兵克奉賢柘林南匯川沙等廳縣於時鴻章初受兵事令程學啟劉銘傳滕嗣武潘鼎新韓正國進南匯之周浦鎮爲北路而西洋英德兵自松江進金山衛爲南路四月十九日常勝軍會英德兵克奉賢縣遂克柘林程學啟追賊至南匯縣城值李慶琛軍潰於太倉賊悉銳攻青浦嘉定洋兵敗走嘉定復陷賊規犯上海程學啟等扼守虹橋大破之時南匯踞賊吳建瀛劉玉林送款於周浦守將劉銘傳潘鼎新五月初一日南匯令鄧賢芬入城受降部署其眾遂收復南匯縣賊率眾萬餘來爭吳建瀛等以降眾擊卻之初四日復合川沙賊來犯劉銘傳督吳建瀛等固守而以伏兵夾擊之賊始遁乘勝收復川沙廳賊旣

圍松江青浦復以大隊分屯廣福林塘橋而厚集於泗濱以拒我軍距程學啟新橋營十餘里新橋距上海三十里賊狂官軍難猝進增壘爲久踞計鴻章親督各軍深夜疾行黎明入賊卡毀之復以劈山砲斃賊數百僞聽王陳炳文僞納王郅雲官以數萬人分十二支圍程學啟營縱火周麾而呼填壕拔鹿角學啟以槍礮禦之不及則擲磚石擊賊尸平壕將踏以登學啟開壁門大呼賊稍卻而賊之分股已踰新橋十餘里勢且逼上海鴻章自統七營往援遇賊徐家匯奮力擊之賊乃散學啟瞭見旗幟大呼出營賊大奔是役也斬賊三千人奪獲器械無算二十二日公弟國荃敗賊於六郎橋左宗棠擊賊於衢州連

破之盡燬東南北三路賊壘 是月布政使銜福建糧儲道趙景賢殉難景賢浙江舉人前刑部侍郎趙炳言子也咸豐二年倡辦湖州團防每戰必捷洵升今職湖州陷後賊械繫至蘇州謀乘隙復城僞慕王譚紹光偵知之遂遇害事聞奉

旨照巡撫例賜卹予諡立傳 川匪藍大順竄湖北陷鄖西縣

石達開竄涪州綦江長甯等處劉嶽昭唐炯等屢擊敗之

六月初六日洪秀全遣黨犯雨花臺營公弟國荃擊卻之自賊之數爲我敗也闔城惶懼僞天王洪秀全飛書召援僞王宗李酋自蘇州糾集悍黨數萬人猛力撲營火器對轟互有損傷總兵張勝祿中槍子洞穿左足初十日賊復來犯國荃豫飭各營

嚴爲戒備賊不得逞 十二日左宗棠進軍龍游 十五日鮑超克甯國府賊酋洪容海以甯國縣城降超用其眾克廣德州 十六日金陵援賊大舉撲營分二十餘支牽制各壘而以悍黨猛撲雨花臺長壕公弟國荃憑壕拒守互有損傷部將劉連捷等拔卡而出陣斬二千餘人僞對王瓚焉賊奔潰國荃冒雨修牆而甯國餘賊嘯聚於雄黃者約二萬人二十四日夜勾通城賊謀襲我營二十五日國荃遣部將易良虎劉連捷等擊走之 僞侍王李世賢犯遂安左宗棠遣楊海泰王文瑞夾擊敗之 二十日左宗棠遣劉典援遂安敗賊於三多 二十二日李世賢由壽昌遁入金華先是僞天王洪秀全因金陵被圍調

李世賢李秀成赴援賊恐左軍直偏杭州以全力駐守金華龍
游世賢聞左宗棠將進攻龍游嗾各軍持半月糧潛從蘭溪嚴
州淳安徑撲遂安爲乘虛襲取分撲江皖之計宗棠飭王文瑞
嚴守遂安復遣劉典等援勦賊屢挫敗乃回竄金華 是月僞
扶王陳德才竄擾浙川內鄉新野唐縣等處 七月

詔授安徽巡撫李續宜爲 欽差大臣 十五日李鴻章會洋
兵克青浦縣 十六日左宗棠敗賊於龍游東門橋 十七日

左宗棠破賊於油埠 十九日林文察秦如虎收復處州府

二十一日左宗棠敗賊於高樓太平祝家堰裘家堰孟塘等處
是月僞扶王陳德才圍南陽府楚軍金國琛率師赴援賊解

圖去 偽翼王石達開由四川大甯竄陝西平利縣闖入楚邊
陷竹谿竹山二縣民團攻克之賊仍竄平利關垭子松杉河等
處 八月李續宜丁憂回籍

以唐訓方署安徽巡撫 初二日偽慕王譚紹洸犯上海之
北新涇程學啟郭松林等擊卻之 十九日左宗棠破賊於龍
游圭塘山 二十六日洋將華爾克慈溪縣創甚死之 三十
日左宗棠擊賊於龍游大破之斬偽懷天義吳明順泗天福邱
逆偽檢點黃逆偽指揮吳逆偽統制李逆等 多隆阿擊陳得
才於荆紫關大破之賊逾關遁先是陝西漢回相仇聚眾煽變
詔以多隆阿督辦陝西軍務適粵匪據拾合擾河南

三國志卷之三十一
三十一
朝廷慮多隆阿一軍阻於賊南以勝保代之

寄諭垂詢多隆阿一軍無須赴陝應於何處駐紮飭公酌量調派又江南難民紛投裏下河

朝廷飭公實力稽查防賊偷渡并飭都興阿力禦裏下河設法兼顧公分條覆奏云自多隆阿克復廬州臣本欲令其會攻金陵意在先取江蘇財賦之區以爲明年籌辦京漕之地不料陝西告警羽檄交馳官文等奏請多隆阿率師援秦而

諭旨亦飭令先保陝西臣雖覓金陵兵單機會可惜然以秦晉爲京師餉源所自出未敢奏調多隆阿西援之師轉而東征也厥後粵逆回竄秦事稍鬆而漢回仇殺望援仍切臣已奏明多

隆阿不必回顧蘇皖或速勦陝省或留駐河南多隆阿軍抵襄陽由光化荆子關入秦并不爲南陽之賊所阻南陽股匪經鄂軍金國琛等會勦解圍亦尙不至爲楚疆之患雷正綰前隊已入關多隆阿中途接奉改派之

旨不知從何處折回若業抵秦境則進退兩難若果回鄂境則常遊

旨駐紮南陽一帶食鄂省之餉擊豫省之賊西可屏蔽秦中不令粵捻續竄關陝南可保障楚省不令鄂北另籌防兵北可聯絡鄭元善葉裕之師東可聯絡蔣凝學穎州之師誠爲一舉而數算皆備勦捻以馬隊爲先僧格林沁撻伐於豫東多隆阿馳

馳於豫西當可肅清中原至江北港汊紛歧飭臣與都興阿籌
守裏下河查楊輔清陳坤書兩股及青陽古隆賢等一股三支
敗賊窮無所之思竄江北係屬意中之事都興阿之兵力只有
此數其新調之紅單船四十號據勞崇光咨已在廣東省河爲
颶風所壞矣是江北應防之要地尙無專汛派防之水師臣現
咨商楊載福囑其親赴下游徧歷靖江如皋通州海門數百里
河面察看何處最衝何處次衝妥籌布置又擬另辦太湖水師
一軍造船百六十號防勦上海松江由澱湖以入蘇州而騰出
黃翼升水軍專防淮陽裏下河一帶以符原議計四個月可以
集事目下太湖水師尙未辦成黃翼升不可離滬裏下河之防

請

飭都興阿黃彬引爲專責臣亦當力籌兼顧 閏八月賊犯甯國府鮑超入城守之先是公奏調廣西按察使蔣益澧率所部五六千人迅速赴浙 十三日益澧軍至浙江克壽昌縣 時大江南北疾疫盛行甯國爲最金陵次之徽州衢州又次之水師及上海蕪湖各軍亦皆癘疫繁興死亡相繼甚至一棚之內無人炊爨公疏稱天降大戾近世罕聞惡耗頻來心膽俱碎若有大股賊匪撲犯甯國旌太等處鮑超張運蘭兩軍不特不能出隊迎戰并不能堅守城壘不特不能堅守以待外援并不能預逃以待再振若撲犯金陵徽州亦深恐病者太多戰守皆無

把握數年來千辛萬苦戰爭之土地由尺寸而廣至數百里倘有疏虞何堪設想而皖北苗捻兩患時時可慮袁甲三李續宜皆將回籍唐訓方新來諸事且萃於微臣一人之身疾疫之災既如彼責任之重又如此臣自度薄德不足以挽厄運非才不足以支危局合無籲懇

天恩簡派在京親信大臣馳赴大江以南與臣會辦諸務分重大之責任挽艱難之氣數臣具有天良斷不敢稍存推諉致誤戎機

上諭大江兩岸疾疫盛行前據該大臣奏到卽深軫念曾經寄諭進攻金陵不必急求速效惟求有以自立傷亡戰士井須加

意拊循茲據疏稱近日秋氣已深而疫病未息甯國金陵徽衢上海蕪湖各軍皆以癘疫死亡相繼猛將如黃慶伍承翰等先後物故鮑超張運蘭楊岳斌等均各抱病軍中甚至炊爨寥寥此時戰守均無把握自屬實在情形惟懇請由京簡派親信大臣前往會辦以分責任之重大挽氣數之艱難諒該大臣亦爲憂勞焦灼所迫朝廷信用楚軍以會國藩忠勇發於至誠推心置腹倚以挽救東南全局自諸軍進偏金陵逆匪老巢已成阱檻惟以艱難時會誠不易得疊經寄諭總以毋徒求效且夕惟當立足不敗之地以竣可乘之機矧茲疾疫繁興各軍將士疲病之餘詎忍重加督責該大臣惟宜愈矢忠誠拊循加意使軍

心益固沴氣潛除各營疾疫將士其各傳旨優加存問本應明
降諭旨慰勞誠以事關軍務或恐人心疑懼且致奸宄從而生
心賊人轉益張其凶穢我國家深仁厚澤二百餘年當此艱危
時勢又益以疾疫流行將士摧折深虞墮士氣而長寇氛此無
可如何之事非該大臣一人之咎意者朝廷政事多闕足以上
干天和惟當齋心默禱以祈

上蒼眷佑沴戾全消我君臣當痛自刻責實力實心勉圖禳救
之方爲民請命以冀天心轉移事機就順至天災流行必無偏
及各營將士既當其阨賊中亦豈能無傳染想該大臣鬱憤之
餘未遑探詢刻下在京固無可簡派之人環顧中外才力氣量

如曾國藩者一時實難其選該大臣素嘗學問時勢艱難尤當
任以毅力矢以小心仍不容一息少懈也 是時士卒死亡大
半而偽忠王李秀成率蘇常悍賊二十餘萬人援金陵十九日
圍攻公弟國荃大營賊用西洋落地開花砲前後轟擊聲動天
地我軍百道堵禦賊更休迭進歷十餘晝夜迄未休息我軍以
大砲火毬擊之燒賊無算抵死勿去而偽堵王黃文金等由東
壩撲犯金寶圩鮑超部將宋國永遣軍禦之於新河莊爲賊所
乘二十九日公弟國荃兩頰受鎗子傷部將倪桂節中礮而殞
賊多開地道日夜環攻國荃率疲病之卒拚死抵禦賊卒不得
逞 是月陳德才由河南竄湖北連陷隨州京山應山應城孝

威等縣金國琛舒保等旋攻克之 九月偽忠王李秀成僞侍
王李世賢合股援金陵犯雨花臺大營公弟國荃連戰破之初
李秀成圍犯雨花臺營歷半月猶未稍息初三日李世賢自浙
江率眾十萬繼至攻撲愈猛我軍傷亡甚眾而賊之死者倍之
初五日官軍出濠擊賊破逆壘十三座斬首數千級十二日賊
埋地道兩穴同時轟發土石上飛賊眾如牆而進前者既殲後
者復登官軍拋擲火毬聞以鎗砲搶險三時堵塞缺口擊斃悍
賊數千賊燄少衰白晝不甚環攻夜間仍輪班逼撲連紮百餘
里於官軍營壕之外相距僅二十丈仍暗開地道翼乘兩夜轟
裂國荃命各軍修內壕內牆以禦之二十三四等日連破其地

洞七處賊計大窘 左宗棠連敗賊於龍游蘭溪湯溪等處

當李秀成圍犯金陵大營之時譚紹洸陳炳文復糾蘇杭嘉興賊十餘萬分道自崑山太倉東犯李鶴章敗賊於陸家行郭松林敗賊於方泰鎮劉士奇鄭國魁會程學啟破賊於三江口四江口等處賊連營數十里大河支港俱設浮橋遂犯黃渡李鶴章程學啟分道擊賊郭松林逾橋敗之賊築卡以阻我師松林值其半渡而擊之賊大潰追北至安亭時四江口守將劉士奇等被圍已久譚紹洸屯吳淞江北陳炳文募南岸程學啟劉銘傳郭松林皆逼賊營拔籤逾濠伏而前斃黃衣賊首數人賊少動乃冒煙直入程學啟身中礮子傷裹創疾前賊由南岸潰而

北我軍三路掩殺四江口之圍始解 十月公弟國荃擊援賊於金陵大破之李秀成李世賢解圍遁自我軍破賊地洞七處羣首智盡能素國荃度賊疲可以一戰初三日率隊出濠連破十數卡初四日夜公弟貞幹偵知西路三汊河隔岸之賊將圖宵遁乃整勁旅分道直出國荃亦令李臣典等進攻東路四壘以防抄襲初五日天甫向曙縱焚四壘而西南諸壘中瞭見東路火發光燭霄漢益無固志棄壘爭竄適貞幹率步騎馳至遂由善橋追至板橋周邨一帶彭毓橘蕭孚泗等亦追賊至南路牛首山一帶自辰至午掃平賊壘數十座王可陞等搜剿敗匪直至方山之西南門外雨花臺旁留守之賊勾結城賊忽出大

股截我歸路劉連捷等橫擊於左易良虎等夾擊於右賊始返
奔其在東路者向南門繞城而遁其在西南路者向秣陵關一
路而遁李秀成李世賢踉蹌奔走金陵大營之圍始解是役也
李秀成自蘇州率十三僞王號稱六十萬李世賢自杭州繼至
號稱二十萬復令僞輔王楊輔清及黃胡賴等股擾甯國僞護
王陳坤書等股由太平府窺金柱關以掣官軍之勢金陵城外
東自方山西至板橋鎮旗幟如林自閏八月十九至十月初四
日圍攻四十六晝夜公弟國荃所部不滿三萬而鮑軍之在甯
國者爲悍首楊輔清黃文金所圍不能赴援金陵公所調浙軍
之蔣益澧蘇軍之程學啟皆以有故不得至公弟國荃設奇被

賊公弟貞幹力戰以通餉道前後殺賊壘數十斬馘數萬營中
火藥用盡乃告貸於湖北江西將士猶目糝面皮肉幾盡國荃
左頰受傷軍興以來未有如此之苦戰也 公疏稱蘇浙各賊
首大舉入寇虜聚金陵意圖吞噬我營合犯上游計甚狡毒仰
賴

聖主威福將士同心以病餘之孱兵當非常之凶敵苦守力戰
時閱四十六日以寡禦眾出死入生卒能挽回危機保全大局
在事文武實著微勞除曾國荃曾貞幹係臣胞弟不敢仰邀議
敘外所有尤爲出力之劉連捷等謹先開單籲懇

恩施以昭激勸

上諭蘇浙諸賊酋因官軍逼攻金陵老巢大舉來援號稱數十萬眾明攻暗襲意圖吞噬各營合犯上游賊計甚爲狡惡經會國藩飭令會國荃督率各營將士以屏病之餘當窮凶之寇苦戰力守四十餘日以寡敵眾出死入生竟能力挽危機保全大局僞忠侍兩逆渠計索鼠竄而去金陵大營危而復安詳覽摺中所敘戰狀各營將士堅忍奮力謀勇兼施深堪嘉尙全營立腳已定仍應嚴密防守徐圖進取之策蘇州等處援賊經此次懲創自不敢復正視惟僞忠逆回蘇之後分黨留守金陵并分股力攻九洲州李世忠未知能否堵禦甯國旌德同時吃緊鮑超張運蘭朱品隆諸軍尙屬羸病之餘著會國藩分兵往援又

論此次逆目李秀成等乘我軍疾疫之時利來犯情形危險該大臣調度合宜曾國荃等水陸各軍能裹創血戰轉危爲安深堪嘉尙第回思從前危迫之際我君臣尤當同深儆懼以旣天庥甯國雖偶爾小挫鮑超謀勇兼優諒能支持金陵援賊經曾國荃等斬殺數萬逆膽已寒該藩司兵力本不甚厚頓兵堅城之下進退兩難恐日久逆黨復生詭計非鮑超之軍由東壩馳往會剿則成相持之勢故甯防甚關緊要非獨逆賊內犯金陵掣動大局爲可慮也 金陵援賊分股竄江北攻九洑州連陷含山巢縣另股由廣德州陷積溪縣公弟國荃分守東西梁山以禦之 左宗棠遣魏喻義攻嚴州破其北路三卡 蘇浙

軍會洋將勒伯勒東攻克上虞嵯縣新昌等城。二十六日黃
翼升率水師勦賊於蘆墟鎮尤家莊汾湖三官塘盡毀其卡進
距蘇州三十里二十七日復回軍勦賊於下田廟上田廟洪家
灘進至審衙。是月僞扶玉陳得才由竹谿竹山竄陝西。十
一月初一日賊陷和州。初二日唐義訓王文瑞會克績溪縣
初七日賊陷祁門縣初十日唐義訓王文瑞復之。十三日
左宗棠克嚴州府初賊首譚富距嚴州譚星距蘭溪二人者兄
弟也皆廣東劇盜李世賢賊其合勢以拒我軍宗棠遣魏喻義
駐軍銅關據險設卡譚富傳僞令將傾巢撲銅關魏喻義先自
率所部掩旗息鼓赴洋溪潛趨鍾嶺分路設伏少頃先鋒悍

賊五百八行過伏起盡殲之後隊萬餘人驚竄回城魏喻義於
夜半時潛抵西北兩門豎立雲梯將士一齊擁上賊拚死抗拒
洋槍如雨我軍以火彈火箭連環拋擲自亥至丑鏖戰三時之
久殺賊二千餘人餘匪望東南狂竄城門猝不及啟由堦上躍
下墜死者不計其數遂復其城 十八日公弟候選知府貞幹
卒於金陵軍貞幹原名國葆補縣學生員少時落落自將脫去
町畦視人世毀譽及書史褒譏熾惡不甚厝意不隨眾爲疑信
時或詰難參伍大破羣惑提督楊載福侍郎彭玉麟始皆客貞
幹所爲僚佐貞幹亟薦此二人英毅非常已願下之其後彭楊
果以水師雄視東南咸豐八年十月兄國華戰歿三河貞幹大

勸誓出殺賊以報仇時鄂帥胡林翼方廣求將才命賁幹領千人自黃州建旆而東十年正月連克太澗灑山三月始與兄國荃會師圍安慶十年八月克之同治元年軍次三山招降三縣義民之陷賊者得四千人署爲兵用破魯港克繁昌下南陵蕪湖與兄國荃會師金陵薄雨花臺值診癘繁興貞幹屢瀕於危定議假歸養病適以援賊大至強起戰守四十六日賊退而病不可爲矣事聞奉

旨追贈按察使旋

加恩照二品例議卹予諡建祠 十九日楊岳斌敗賊於三汶河岳斌卽載福改名也二十二日岳斌復擊賊於三汶河連敗

之 二十七日楊岳斌會陸軍羅逢元敗賊於護駕墩燬潞
二百餘號 鮑超擊賊於馬頭鎮楊柳鋪大破之 二十八日
賊首駱國忠以常熟縣降 程學敏敗賊於崑山之蟠龍
郭松林敗賊於太倉 十二月初五日賊陷青陽縣 初九日
公弟貞幹柩至安慶公撫棺大慟入城受弔 初十日
蕭慶衍會克運漕鎮 二十一日公弟國荃破賊谷里村
橋 二十二日蕭慶衍敗賊銅城關 二十五日朱品騭
青陽縣 左宗棠連敗賊於龍游湯溪金華蘭溪等處
劉嶽昭擊石達開於救州雙龍場大破之賊竄入雲南境
求闕齋弟子記卷七